



THEOT Bel and the Dragon in IES77

Text taken from Accordance Module=Mahibere Hawariyat

Drafts 1-3 were prepared by the Addis Ababa Transcription Team, directed by Daniel Assefa; Draft 4, Ralph Lee

Bel 1 እምድሃረ ሞተ ንጉሥ አስጢያግስ ወተቀብረ ኀበ ተቀብሩ አበዊሁ ነሥኦ ቂሮስ ፋርሳዊ መንግሥቶ።

Bel 2 ወሀሎ ዳንኤል ደቀ ጽርሑ ለንጉሥ ወይከብር እምኩሎሙ አዕርክቲሁ።

Bel 3 ወሀሎ ምስል ዘያመልክዎ ሰብኦ ባቢሎን ወያስተዋፅኦ ሎቱ ኩሎ አሚረ ሲሳዮ ሥንዳሌ ዕሥረ ወካዕበ በመሥፈርተ አርጣባስ ወአባግዐ አርባዕተ ወወይነ ስድስተ መስፈርት።

Bel 4 ወያመልኮ ንጉሥ ወየሐውር ኀቤሁ ኩሎ አሚረ ወይሰግድ ለአምላኩ ወይቤሎ ንጉሥ ለዳንኤል ለምንት ኢትስግድ ለቤል።

Bel 5 ወይቤሎ ዳንኤል ለንጉሥ ኢያመልክ ጣዖተ ግብረ እደ ሰብኦ ዘእንበለ ዳእሙ ለአምላክ ሕያው ዘፈጠረ ሰማየ ወምድረ ወመኰንን ውእቱ ለኩሎ ዘነፍስ።

Bel 6 ወይቤሎ ንጉሥ ይመስለከኑ ዘኢኮነ አምላክ ሕያወ ቤል ኢትፊኢት መጠነ ይበልዕ ወይሰቲ እንተ ጸብሐት።

Bel 7 ወሠሐቆ ዳንኤል ወይቤሎ ኢያስሕቱክ ኦ ንጉሥ ዝሰ ውስጡ ወአፍኣሁ ብረት ኢይበልዕ ወኢይሰቲ ለግሙራ።

Bel 8 ወተምዐ ንጉሥ ወጸውያሙ ለገነውተ ቤል ወይቤሎሙ ለእመ ኢነገርክሙኒ መኑ ዘይበልዕ ዘንተ ሲሳየ ትመውቱ።

Bel 9 ወእመሰ አብጸሕክሙ ሊተ ከመ ቤል ይበልዕ ይመውት ዳንኤል ዘፀረፈ ላዕለ ቤል ወይቤሎ ዳንኤል ለንጉሥ ለይኩን በከመ ትቤ።

Bel 10 ወየአክሎ ገነውቱ ለቤል ሰብዓ ዘእንበለ አንስት ወደቅ ወሐሩ ንጉሥ ወዳንኤል ውስተ ቤተ ቤል።

Bel 11 ወይቤሎ ገነውቱ ቤል ናሁ ንሕነ ነሐውር አፍኦ ወአንተ ንጉሥ ሥራዕ ማእዳቲሁ ወቅዳሕ ወይኖ ወአስተናብር ወፅፁ ጥናቶ ወኅትም በማኅተምከ።

Bel 12 ወጊሥ በጽባሕ ለእመ ኢረከብከ በዘይበልዕ ኩሎ ቤል ንመውት ንሕነ ለእመ አኮሰ ዳንኤል ዘሐሰወ ላዕሌነ ይመውት።

Bel 13 ወእመንጉቱሰ የአምሩ ዘይገብሩ በታሕተ ማእድ ቦሙ ፍኖት ኀቡእ ወእንተ ህየ ይበውኡ ዘልፈ ወይበልዑ ወይሰትዩ።

Bel 14 ወወጊኦሙ እሙንጉቱ ሠርዐ ንጉሥ ለቤል ዘይበልዕ ወይሰቲ ወአዘዞ ዳንኤል ወለቀኦልዔሁ ያመጽእ ሐመደ ወረበበ ውስተ ኩሎ ቤቱ ለቤል በቅድመ ንጉሥ ባሕቲቱ ወወጊኦሙ ዐጽዉ ጥናተ ወኅተሙ ማኅተመ ንጉሥ ወዳንኤል።

Bel 15 ወኀሊፎሙ ቦኡ ገነውተ ቤል በሌሊት በከመ ያለምዱ ምስለ አንስቶሙ ወደቂቆሙ በልዑ ወስትዩ ኩሎሙ።

Bel 16 ወጌሡ በጽባሕ ንጉሥ ወዳንኤል።

Bel 17 ወይቤ ንጉሥ ለዳንኤል ዳኅናኑ ማኅተምከ ዳንኤል ወይቤ ዳንኤል እወ ዳኅን ንጉሥ።

Bel 18 ወእምዝ ሶበ አርኀወ ጥናተ ነጻረ ንጉሥ በዘወድኡ ማእደ ወውዐ በዐቢይ ቃል ወይቤ ዐቢይ አንተ ቤል ወአልብከ ትምይንት።

Bel 19 ወሠሐቆ ዳንኤል ወአኀዞ ንጉሥ ወከልኦ ኢይባእ ውስጠ ነጽር ምድረ ወርኢ አሠረ ምንት ዝንቱ።

Bel 20 ወይቤሎ ንጉሥ እሬኢ አሠረ ዕደው ወአንስት ወደቅ ወተምዐ ንጉሥ።

Bel 21 ወአኀዞሙ ሶቤሃ ለገነውተ ቤል ለአንስቶሙ ወለደቂቆሙ ወአርኣይዎ ፍኖተ ኀቡእ እንተ ሶበ ይበውኡ ወይበልዑ ዘውስተ ማእድ።

Bel 22 ወቀተሎሙ ንጉሥ ወወሀቦ ወመጠዎ ለዳንኤል ቤልሃ ወቀጥቀጠ ወነሠተ ቤቶ።

Bel 23 ወሀሎ ከይሲ ዐቢይ ዘያመልክዎ ሰብኦ ባቢሎን።

- Bel 24 ወይቤሎ ንጉሥ ለዳንኤል ለዝኒ ብርትኑ ትብሎ ወናሁ ሕያው ይበልዕ ወይሰቲ ወኢትክል ብሂሎቶ ኢኮነ ሕያው አምላክ ወስግድ ሎቱ።
- Bel 25 ወይቤሎ ዳንኤል ለእግዚአብሔር አምላኪየ እስግድ እስመ ውእቱ አምላክ ሕያው።
- Bel 26 ወአንተስ ንጉሥ አብሐኒ እቅትሎ ለዝ ከይሲ ዘእንበለ መጥባሕት ወበትር ወይቤሎ ንጉሥ ለዳንኤል አባሕኩከ።
- Bel 27 ወነሥአ ዳንኤል ፒሳ ወሥዕርተ ወሥብሐ ወአብስሎ ኅቡረ ወገብሮ ልሕሉሐ ወአፍሐሞ ለከይሲ ውስተ አፋሁ ወውኒጦ ነቅዕ ውእቱ ከይሲ ወሞተ ወይቤሎሙ ዳንኤል ርእዩ አምላክክሙ።
- Bel 28 ወእምዝ ሰምዖሙ ሰብአ ባቢሎን ተምዑ ጥቀ ወተመይጡ ላዕለ ንጉሥ ወይቤሎ ተህይድ ንጉሥ ቤልሃኒ ቀጥቀጦ ወገነውትኒ ቀተለ ወከይሴኒ ቀተለ።
- Bel 29 ወይቤሎ ንዑ ንሑር ኅብ ንጉሥ ሀብነ ዳንኤልሃ ወእመ አኮስ ንብሎ ንበረብር ንዋየከ ወንቀትለከ ወቤተከሂ ናውዒ በእሳት።
- Bel 30 ወርእዮ ንጉሥ ከመ ጥቀ ያጠውቅዎ ሶቤሃ ግብር ኮኖ ለንጉሥ ወመጠዎሙ ዳንኤልሃ።
- Bel 31 ወወሰድዎ ወወደይዎ ውስተ ግብ አናብስት ወነበረ ህየ ስድስተ ዕለተ።
- Bel 32 ወሀለዉ ውስተ ግብ ሰብዑቱ አናብስት ወኰሎ አሚረ ይሴስይዎሙ ክልኤተ ሰብአ ወክልኤተ አባግዐ ወአሜሁስ ኢወሀብዎሙ ምንተኒ ከመ ይብልዕዎ ለዳንኤል።
- Bel 33 ወሀሎ ዕንባቆም ነቢይ በይሁዳ ወአብስለ ተብሲለ ወወደየ ውስተ አስፈሬድ ወወፈረ ሀቅለ ይሰድ ለእለ የዐጽዱ።
- Bel 34 ወይቤሎ መልአክ እግዚአብሔር ለእንባቆም ሰድ ዘንተ ምስሐ ለዳንኤል ውስተ ብሔረ ባቢሎን ኅብ ግብ አናብስት።
- Bel 35 ወይቤሎ እንባቆም እግዚአብሔር ኢየአምር ባቢሎንሃ ወኢርኢኩ ግብ አናብስት አይቱ ውእቱ።
- Bel 36 ወአኅዞ መልአክ እግዚአብሔር በድማሁ ወጾሮ በሥዕርተ ርእሱ ወአብጽሐ ኅብ ግብ አናብስት ዘባቢሎን በኅይለ መንፈስ።
- Bel 37 ወክልሐ እንባቆም ወይቤ ዳንኤል ዳንኤል ንሣእ ዘንተ ምሳሐ ዘፈነወ ለከ እግዚአብሔር።
- Bel 38 ወይቤ ዳንኤል ተዘከረኒኑ እግዚአብሔር ዘኢኅድኅሙ ለእለ ያፈቅርዎ።
- Bel 39 ወተንሥአ ዳንኤል ወበልዐ ወአግብአ መልአክ እግዚአብሔር ለእንባቆም ብሔሮ ሶቤሃ።
- Bel 40 ወመጽአ ንጉሥ በሳብዕት ዕለት ይላህዎ ለዳንኤል ወቀርብ ኅብ ግብ አናብስት ወነጸረ ወርእዮ ለዳንኤል ይነብር ማእከለ አናብስት።
- Bel 41 ወክልሐ ንጉሥ በዐቢይ ቃል ወይቤ ዐቢይ አንተ እግዚአብሔር አምላክ ዳንኤል ወአልቦ ባዕድ አምላክ ዘእንበሌከ።
- Bel 42 ወአውፅአ ለዳንኤል እምግብ አናብስት ሶቤሃ ወለእልክቱስ ዘፈቀዱ ይቅትልዎ አኅዝዎሙ ወወደይዎሙ ውስተ ግብ አናብስት ወበልዕዎሙ ሶቤሃ በቅድሜሁ።
- Bel 43 አሜሃ ይቤ ንጉሥ ይፍርህዎ ኰሎሙ እለ ይነብሩ ውስተ ምድር ለአምላክ ዳንኤል እስመ ለሊሁ መድኅን ውእቱ ወይገብር ተአምራተ ወመንክራተ ውስተ ምድር ወውእቱ አድኅኖ ለዳንኤል እምአፈ አናብስት።